

# Fastizs da casturs en la Svizra Bassa

La Pro Natura arranscha excursiuns

DA GUIU SOBIELA-CAANITZ

■ **La Pro Natura (Pn, [www.pronatura.ch](http://www.pronatura.ch)), la principala uniun per proteger la natira svizra, s'engascha per mantegnair e sustegnair la fauna e flora indigena. Ina da sias emprimas prestaziuns, la creaziun dal Parc naziunal svizzer (1914), festivescha ses tschientavel anniversari l'onn che vegn. Sias secziuns datti oz en mintga chantun svizzer; quella dal Grischun ha l'adressa electronica [pronatura-gr@pronatura.ch](mailto:pronatura-gr@pronatura.ch). Tranter autras finamiras promova Pn la biodiversitad: Las spezias frequentas e tipicas ston restar frequentas, quellas ch'èn vegnidas raras ston puspè vegnir frequentas. Ina da questas è il castur (v. La Quotidiana dals 30 da fanadur 2010), pli precis il castur europeic (per latin *Castor fiber*), il pli grond animal ruider da noss continent. En Svizra vivan oz var 1600 casturs. Il project «Hallo Biber! / A l'eau castor!» ([pronatura@hallobiber.ch](mailto:pronatura@hallobiber.ch)) arranscha sis excursiuns da primavaira tar ils fastizs da la lavur dals casturs cun derscher plantas. L'emprima era a Lengwil/TG, tranter il Rain e la Thur, la segunda**

Füllinsdorf/BL, en il Giura, sper il flum Ergolz.

## Da l'Aara a la Venoge

Trais excursiuns, specialas per famiglias, han lieu la sonda sontga, ils 30 mars, a las 14.00, e pretendan buns chalzers. Ina

sa splega en la zona alluviala da Rubigen/BE lung l'Aara\*, a sidost da la chapitala, e vegn manada da Beatrice Baeriswyl. Lieu da scuntrada è il parcadi Campagna, sper la fermada dal bus a Rubigen Hunzigerbrügg. Ins duai, sche pussaivel, manar in spievel da champa-

gna. Era l'excursiun dal medem di, speciala per famiglias, ils 30 da mars a las 14.00, pretenda buns chalzers e, sche pussaivel, in spievel da champagna; ella vegn manada da Beat Stöckli. Responsabel è Peter Lakerveld\*. Lieu da scuntrada è la staziun d'Aarwangen Schloss/BE, sin la lingia da viafier a binaris stretgs che collia Langenthal/BE cun Soloturn. La terza excursiun ha lieu duas giadas: Sonda, ils 30 da mars, e dumengia da Pasca, ils 31, mintgamai a las 14.00, a Renges en la vischnanca d'Ecublens/VD a vest da Losanna; ella vegn manada per franzos da Noémie Tharin (tel. 079 391 92 61). Ins duai s'annunziar ordavant tar lezza u tar l'adressa electronica [secretariat.romand@pronatura.ch](mailto:secretariat.romand@pronatura.ch), cun inditgar il di giavischà ed il dumber da persunas che fan part. Lieu da scuntrada è la fermada «Renges» dal bus nr. 30 d'Ecublens/VD. L'excursiun pretenda buns chalzers e sa splega lung il flum Venoge (36 km), gist avant sia sbuccada a vest da Losanna en il Lai da Geneva. La Venoge nascha al pe dal Giura vadais; ella è renumada en l'entira Romandia grazia a la poesia che Jean Villard «Gilles» (1895–1982) l'ha deditgà. I suonda ina

part da la segunda strofa, nua ch'il poet lauda ses flum tuttatfatg vadais, entant ch'ils Genevrins possedan mo in pitschnin tochet dal Rodan :

*Bien sûr, c'est pas le fleuve Jaune,  
Mais c'est à nous, c'est tout vaudois,  
Tandis que ces bons Genevois  
N'ont qu'un tout petit bout du Rhône.*

La davosa excursiun tar ils fastizs dals casturs, speziala per famiglias, pretenda buns chalzers e scha pussaivel in spievel da champagna; ella sa splega la sonda suenter Pasca, ils 6 d'avrigl, a las 13.50, lung l'Aabach ed il Lai da Hallwil. Responsabel è Peter Lakerveld\*, lieu da scuntrada la staziun da Mosen/LU, sin la viafier che collia Lucerna cun Lenzburg/AG.

Ins na sto betg s'annunziar ordavant. Projects sco quel che la Pn deditescha al castur porschan l'ocasiun d'emprender d'enconuscher e respectar meglier la natira svizra.

\* Responsabel : Peter Lakerveld, Schwarzenburgstr, 11, 3007 Berna. Tel. 079 708 04 90. Posta electronica : [mittelland@hallobiber.ch](mailto:mittelland@hallobiber.ch)



En Svizra vivan oz var 1600 casturs.